

Д. Цэвэгмид

САРТАЙ ШӨНӨ

Д. Цэвэгмид

САРТАЙ ШӨНӨ

“Улсын хэвлэлийн газар” Улаанбаатар хотноо 1974 онд эрхлэн хэвлүүлсэн “Д. Цэвэгмид: ЗОХИОЛУУД” номоос авч Цогт охин тэнгэр сангийн захиалгаар Цагаан бамбарууш хэвлэлийн газарт 2020 онд цахим хэлбэрт хөрвүүлэв.



ЦАХИМ НОМЫН САН: www.e-nom.mn

-

Уг номыг “[Болор дуран](#)” шалгуураар шүүсэн болно.
Программтай танилцах бол сурталчилгаа дээр товшиж холбоос руу
орно уу.

БОЛОР ДУРАН 2.0
МЭДЭЭ ШАЛГУУР

**"БОЛОР ДУРАН"
ЗӨВ БИЧИГ ШАЛГАХ
ПРОГРАМ**

- ✓ 60 сая үгийн сантай.
- ✓ Алдаатай үгсийг илрүүлж, зөв үгсийг санал болгоно.
- ✓ Хэлзүйн тайлбар тольтой.
- ✓ Хувийн үгийн сан үүсгэх боломжтой.

БОЛОР
БОЛОР

САРТАЙ ШӨНӨ

Үдшийн бор хараа замхран, өндөр огторгуйн алс мандалд од мичид гялалзан түгэв. Эргэн тойронд нам гүм, гагцхүү сэвэлзэх зөөлөн салхины аясаар өвсний толгой бөхөсхийн, алтан зул цэцгийн хонгорцог өчүүхэн зуур чичирхийлж үл мэдэг хоржигнох чимээ сонсогдуулах нь зөвхөн хээрийн гөрөөсний чихэнд сэрэмж төрүүлэм ажээ.

Салхины урсгал намдсаар дахин анир тасрав. Дорно зүгт лүглийн сүүдэртэх уулсын хяр хянга дээгүүр тэнүүн цэлмэг, тэргэл саран өндийхөд, тэнгэрийн хязгаар цэлийн холдож мяралзах одод улам ч олшрон идэр намрын намуухан, дулаахан, тунгалагхан шөнө болов.

Өөдлөх сарны туяанд уулсын сүүдэр татагдан богиносож, гэрэлт цагаан хөндийн дундуурх зөрөг зам танигдаж эхэлснээс хойш нэлээд цаг өнгөрөх үес Ингэтийн дөрөлжөөр морьтой хоёр хүн хатируулан гарч ирээд замд орохын чацуу галгиулж, толгой холбон хүүрнэлдэхийг ажиглавал эрэгтэй эмэгтэй хос залуу байлаа. Богинохон зуур морин түвэргээн сонсогдсон боловч энэ орчмын нам гүм байдал төдий л алдагдсангүй, харин мөнгөн саран өндрийг тэмүүлэх нь тэднийг гийгүүлэхийг яарсан мэт. Хааяа замын дэргэдэх бутны ёроолд бултаж хэвтсэн болжмор шувуухайнууд морины хөлөөс зайлж дэрсхийн нисэвч сайх хоёр түүнийг ажсангүй, бодвол зам нэгтэй залуу хосын цээж бие дунд сэтгэлийн бялзуухай дэрвэж хамаг анхаарлыг нь татсан бололтой.

— Чи аавдаа хэлсэн үү? гэж эрэгтэй нь асуув.

— Үгүй, чи хэлсэн үү?

— Би ч хэлээгүй, маргааш өглөө босохдоо л мэдэж баяр хөөр болно биз.

— Бид хоёр хаа буух юм бэ? Яаж танайд орно доо?

— Гэртээ л бууна даа гэж эрэгтэйн хариулахад

«Эднийх илүү гэр байхгүй билээ. Ээж аавдаа хэлээгүй бол энэ орой болсон хойно эмгэд өвгөдийг түйвүүлэх хэрэг гарах нь ээ» гэж бодогдохоос эмэгтэйн сэтгэл түгшин эрслэн хэлэх үгээ олохгүй, нэгэн хэсэг бодлогошрон явснаа өндөр өлөн өвстэй намгархаг хөндийг өнгөрч агь гангын үнэр анхилсан гүвээ өөд авирах үес сая ам нээж,

— Өлзийсайхаан! сар хэлтийлээ. Ийм орой аав, ээжийг чинь сэрээсний хэрэггүй юм биш үү?

— Тэгвэл яах вэ?

— Чи л мэд дээ гэж эмэгтэй нь хариу хэлээд өвс шүүрэн дугтчих мориныхоо жолоог татаж Өлзийсайхан тийш харав.

— Жаргал аа! Хурдхан яваад манай хотод хүрье. Аав, ээжийг шөнө сэрээхгүй гэвэл тэргэн доор унтчихам заа. Манай гэр ч гэж гэр дээ. Нэг муу шар овоохой л байгаа шүү дээ. Гадаа гэр хоёр бидэнд ижил болсоор удлаа. Дөрвөн ханатай гэрийн мод хүрээний нэг ламаас унагатай гүүгээрээ арилжин авсан юм сан. Гэтэл бүрхээх юм бас л заяагаагүй байна. Арга чаргыг нь эрж нэг юм олохыг бодно доо. Гэвч чамтайгаа байсан цагт гэртэй ч дулаан, гэргүй ч дулаан тийм үү? гээд Өлзийсайхан жолоогоо эргүүлж Жаргалд ойртон, түүний мөрөн дээр гараа тавив.

Хос залуугийн нүд харилцан бие биеэ ширтэлцэнэ. Сарны туяанд Жаргалын инээмсэглэх царай цэлмэг сайхан. Өлзийсайханы туулж өнгөрүүлсэн бүх цэлмэг өдрүүдийг нийлүүлснээс ч илүү цэлмэг, түүнд идрийн цог, гоо үзэсгэлэн төгс, амьдралын долгионт далайг туулах зориг дүүрэн харагдана.

Одот тэнгэрийн дунд онцгой гэрэл эрдэнэ болсон сар, саруул сар, гэгээн сар Өлзийсайхан тийш хандаж: «Энэ охин эцэг эх, ах эгч, бяцхан охин дүүгээ орхиод чиний гэрт очиж чамтай амьдралаа холбохоор зорьж явна. Эрэгзэн тайж хүүдээ эрсэн боловч тэднийд очсонгүй. Эрэгзэний хүү Тавхайжамц торгон өмд, хоргой эмжээртэй оймс, цагаан хаш соруулаа сайрхаж үргэлж хормойгоо сөхөж суудаг, хатирч жороо морьдыг өдөртөө сэлгэдэг, тэднийх мянгаад хоньтой, илүү гэртэй боловч түүнийг тоосонгүй. Тэгээд хаврын салхи хаахаа больсон шар эсгий овоохойтой, унах ганц морьтой, улирал бүхэнд уранхай дээлтэй чамд ирж байна шүү. Тавхай жамцын өгсөн торгон алчуурыг аваагүй атлаа чиний бэлэглэсэн ямбуу алчуураар толгойгоо боогоод явна. Арван наймын босгонд дөнгөж тулж яваа идэрхэн нас биеэ ингэж чамтай холбосны хариуд чи яах юм бэ? Түүнд чи аз жаргал өгөх ёстой» гэж шивнэн хэлэх шиг болоход:

Тийм ээ. Энэ бид хоёрын аль алин нь аз жаргалын эрэлчин юм. Хэн хэндээ өмөг түшиг болж явна даа гэх бодол Өлзийсайханы сэтгэлд төрөгдөн нэг чухал юм хэлмээр санагдаж:

— Жаргал аа! Би чихэнд чинь нэг юм хэлэх үү?

— Чихэнд хэлнэ гэв үү? Энэ эзгүй хээр чи бид хоёрын яриаг хэн сонсдог юм бэ?

— Их нууц юм шүү. Чихэнд чинь шивнэж хэлэхгүй бол тэр өндөр цагаан юм дуулчих магадгүй.

— Тэр чинь амьтай юм биш, ард хоцордог замын бэлчир л байна шүү дээ гээд Жаргал инээмсэглэнэ.

Намрын шөнө намуухан тунгалаг хэвээр боловч гийгүүлэгч сар баруунаа хэлбийх нь шинэхэн хосын нандин хүсэл, далд сэтгэлийн нууцаас олж мэдсэн бүхнээ өөр бусдад хэлэхийг яарсан мэт.

— Жаргал аа! явсхийе. Тэмээтийн хөтлөөр даваад нуурын хөл ортол нэлээд зайтай байна шүү. Эртхэн хүрэхийг бодъё гээд Өлзийсайхан жолоогоо чангалж морио гуядав.

Энэ шөнийн хоёр жуулчин, өндөр хялганат тал газрыг өнгөрч бут сондуул элбэгтэй нарийхан хөндийг гатлаад, харагдах намхан хөтөл дээр гарч, цаашаа тогтож торолгүй одов.

Удалгүй нохой хуцах бүдэгхэн сонсогдоно. Хүний амьдралын чулуут харгуй барагдашгүй баялаг учралтай, мундашгүй олон бэлчиртэй, тэгээд бас тэр бүхэн нь адилгүй, аз заяах бэлчир ч бий, аюул тохиолдох салаа ч буй. Энэ удаа Өлзийсайхан Жаргал хоёр саадгүй шулуухан явсаар үнэхээр жаргалын замын уулзварт тулав. Амраг хосын хүссэн газраа хүрэхэд нохойн дуу ойртов.

Холын чимээгээр хуцаж гүйлдсэн ноход эзнээ танихдаа дуугаа хураамагц хот даяар дахин нам гүм болов. Гагцхүү ижлээ мөрөөдсөн аргамжааны морь хааяа үүрсэн, хотолсон хонь, хэвтсэн үхэр хивдсээ хивэх нь сонстож, хээр биш гэртээ, хүний биш өөрийн газар, элэг нэгтэй ээж аавын хот, өндөг байхаас эхлэн өсөж бойжсон үүр уурхайн амьсгал нь өег дулаан санагдана.

Тэр хоёр морьдынхоо эмээлийг аль болохоор сэмхэн авав. Гэвч талын малчдын сонор соргог чихэнд дөрөө хангинах чимээ хэдий нь сонстжээ. Өлзийсайханы ээж хүүгээ ирэв гэж таниад «домбонд халуун цай, тавагт болсон мах бий, авч идээрэй» гэж хэлэхээр түүний гэртээ орж ирэхийг хүлээсэн боловч энэ удаа хүү нь гэртээ орсонгүй. Өд жигүүр нь ургаж гүйцэхэд үүрээ орхин нисдэг хун шувууны дэгдээхэй нуурын сайхан, зэгсний аглагийг сонгож шинэ үүр засдагчлан Өлзийсайхан сахих голомтыг асааж, түших ханийг олж шинэ амьдралыг эхлэхээр сэтгэл шулууджээ.

Баяд ноёдын хүү гэрлэхдээ сүй бэлэг тавилцан сүрэг малаар инж туулгаж, шинэ гэрийн хурим найрын дуу өдөржин, шөнөжин үргэлжилдэг билээ. Гэтэл Өлзийсайхан Жаргал хоёрт харилцан хэлтийсэн хайр сэтгэлээс эрхэм бэлэг сүй байсангүй, хамтран нийлж хүчээ нэгтгэхээс илүү эрдэнэ олдсонгүй.

1969 он

1974 оны хэвлэл “Д. Цэвэгмид: ЗОХИОЛУУД” номын Хэвлэн
нийтлэлийн мэдээлэл:

Д. ЦЭВЭГМИД

ЗОХИОЛУУД

УЛСЫН ХЭВЛЭЛИЙН ГАЗАР
УЛААНБААТАР 1974

Редактор Б. Бааст
Зураач Д. Сандагдорж

Уран сайхны редактор В. Одгийв
Техник редактор Д. Юмжав
Хянагч Н. Буянжаргал, Л. Даидаваа

А— 51785.
Өрөлтөд 1973 оны 10-р сарын 25-нд
Хэвлэлд 1974 оны 2-р сарын 20-нд
Хэвлэсэн тоо 7300
Х.х 13, 5 Х.н.х. 21, 4 Т.х. 18, 90
Цаасны хэмжээ 84Х108/32.
Х. г. № 423/73.
Зах №323

Улсын хэвлэлийн комбинатад хэвлэв.
Улаанбаатар, Сүхбаатарын талбай